

Penjenamaan Pentadbir sebagai Pengurus UMP



Kijal, Terengganu, 12 Februari- Dengan penjenamaan nama Pentadbir bagi kalangan pegawai bergred N41 hingga N54 kepada nama Pengurus bakal melonjakkan pencapaian tahap daya saing, kepimpinan dan inovasi barisan pengurus dalam merealisasikan hasrat Universiti Malaysia Pahang (UMP) menjadi universiti teknologi terunggul.

Penjenamaan ini diumumkan Pendaftar UMP, Abd. Hamid Majid dalam program UMP *Manager's Retreat "Take Charge"* anjuran Bahagian Pembangunan Sumber Manusia, Jabatan Pendaftar di Resorts World Kijal, Terengganu baru-baru ini. Program bertujuan untuk memperkuatkan pengurusan kerja berpasukan dan hubungan komunikasi yang baik serta berkesan bagi mewujudkan suasana harmoni dalam organisasi serta meningkatkan pengetahuan dan daya pemikiran analitikal dalam kalangan para pengurus UMP.

Program juga membolehkan semua Pengurus bekerjasama dalam menilai semula prestasi pencapaian Pelan Strategik UMP 2011-2015 yang telah dilaksanakan bagi memastikan pelaksanaan dan pencapaian Pelan Strategik UMP 2016-2020 dapat direalisasikan dengan efektif dan efisien.

"Pengurus UMP perlu mempunyai pemikiran dan tindakan yang strategik serta global dalam memartabatkan UMP sebagai universiti teknologi bertaraf dunia. Program ini membolehkan semua peserta mencari kesepakatan dalam merangka strategi bersama bagi mencapai objektif yang telah ditetapkan oleh universiti," katanya.

Beliau menegaskan menjadi satu kemestian bagi semua pengurus UMP untuk mengukuh dan memikirkan semula peningkatan pengetahuan (*knowledge*), kemahiran (*skills*), kebolehsesuaian (*adaptability*) dan daya tahan (*resilience*) diri supaya menjadi pengurus yang lebih atau sentiasa relevan dengan keperluan dan perkembangan UMP dan keperluan serta perkembangan global.



Hadir merasmikan program Naib Canselor UMP, Profesor Dato' Dr. Daing Nasir Ibrahim yang mengharapkan semua pengurus bertindak proaktif serta beralih daripada paradigma lama kepada budaya baru yang mengutamakan inovasi dan penciptaan serta pemerkasaan intelektual dan profesionalisme dalam mencapai agenda Pelan Strategik UMP.

Program dikendalikan oleh LHI Consulting Sdn Bhd ini dengan menjalankan aktiviti seperti management games dan explorace yang memberikan impak yang amat baik kepada semua dari segi kerjasama dalam kumpulan, mengeratkan silaturrahim sesama pengurus dan peluang untuk menyuarakan pendapat masing-masing dalam menambahbaik proses serta sistem pentadbiran di universiti.

Turut berlangsung forum yang bertajuk 'Realiti Pentadbir Masa Kini: Pemikiran Global' yang menggandingkan mantan Pendaftar Universiti Teknologi Mara (UiTM), Dr Hajah Zahrah Mokhtar dan Pendaftar Universiti Perdana, Norpisah Mat Isa manakala Hj. Abdul Shukur Ishak sebagai pengantara. Forum ini turut memberi dimensi baharu kepada para pengurus UMP supaya mempunyai pemikiran dan tindakan yang strategik serta global dalam memartabatkan UMP sebagai universiti teknologi bertaraf dunia.



Disediakan Suhana Mohd. Nor dari Jabatan Pendaftar dan suntingan Bahagian Komunikasi Korporat PNC

Posted By : NORHIDAYAH BINTI MOHAMAD Date Posted : 17-02-2017, 17:08:33